

# He senn ich deheem · Mundartliche Gedichte

Von Willy Neußer

## Am Bercheme Fahr

De Wenk ströof dorch et Pappelloof  
un sprenkelt dausend Sonnefleck.  
De Möcke danzen Hoof an Hoof,  
en Merl hack Schneck en de Heck.

Et blänkich Wasse schwabbelt jäng  
lans Steen un Böötsche, well nohm Rhing.  
En Koh, hüür, trööt. Un Jlockekläng.  
Em dünne Jrasstöck spelle Kning.

De Hannes, Kapp deaf op de Naas,  
am Fährhuus esse ennjenick.  
E Päärche, henge weck em Jraas,  
hält Hängche un vejooß de Zick.

He es e Stöckche Herrjottswelt  
von Iewichkeet zo Iewichkeet.  
Wer heh sich att ens stell vehällt  
met oppem Häzz, es jood jeleet.

*Wenk* — Wind  
*ströof* — streift  
*loof* — Laub  
*Merl* — Amsel

*jeleet* — geleitet

## An de Heembachquell

Luur, deaf do onge!

Fissele, rissele, quissele,  
lans Würzelche un Klömpche,  
met Sandkörnche jeschibbelt.  
Onge Loof, Stöckelche, jröne Blättche.  
Bletzije Fäddemche, jeknöddelt, jesplesse.  
E Kühlche heh, e Pöhlche doh.  
Wedde fott.

Handbreet em Moos, dorch de Mutt.

Kalt jetz un strack ene Strohl.

Ne zwätte,  
de drette dozoh.

Ne Brocke Quarz:

överet Jeseech em jeloofe.  
Gluckgluck, gluckgluck,  
öm en Eechewurzel.  
Noch mieh Jesiefs von beeze Segge.  
Et irschtemohl en de Sonn,  
dröm ahnjehahle:  
kann janz sich drenn sehn.

Nu fott ävve, jetz senn ich  
de Heembaach.  
Halt mich net op,  
de Leyeweihe moß voll.

*strack* — gerade

*Jesiefs* — Rinnsale  
*beeze* — beiden

## Johd'er met nohm Ravensberch?

Johd'er met nohm Ravensberch  
bei däm schüüne Wedde?  
Pette, Jössep, Kättche, Märch,  
donn us jet veträdde.

Jom'me iersch de Jass erop  
lans Berkhüesch Schüür,  
dorch de Wisse dat Pädche?  
Am Kraadepöölche es en Bank.  
Sätz üch jett.

Luur ens, schwazz voll Kühlingsköpp!  
Un doh, en dem Struch,  
E Vuhelsness! ———  
Nu kott wegge!

Johd'er met nom Ravensberch  
bei däm schüüne Wedde?  
Pette, Jössep, Kättche, Märch,  
donn us jett veträdde.

Wat stonn heh staatse Berke  
am Sonneberch en däm Mudd.  
Ich jlöv, die heh, Kättche,  
kriss de fürene Maiboom  
an de Jevvel jestallt nächs Johr. ———

Es dat e Fussloch dohengen?  
Och näh, doh liejen Kningsköttele. ———  
Heh!

Johd'er met nohm Ravensberch  
bei dem schüüne Wedde?  
Pette, Jössep, Kättche, Märch,  
donn us jet veträdde.

Domme es deng Täschemetz,  
ich well me ne Fuhlboom schnegge.  
Märch, wells de ne Faarn hann,  
do kanns de de Möcke met jaage.  
E Käuedche! Dat fangen ich de!  
Von däm Fell kriss de ne Muff.  
Komm wegge, du Jeck,  
dat schmieß dich jlich met Dännemöpsje.

Johd'er met nohm Ravensberch,  
bei dem schüüne Wedde?  
Pette, Jössep, Kättche, Märch,  
donn us jet veträdde.

Doh es joh dä Steen.  
Wat es der jruuß un deck!  
Un bahl esu jlatt wie e Schüürendenn. —  
Mann, heh es ävve ne deefe Basch.  
Wemme dat denk,  
dat heh e Kerchelche stonnt  
un eene jewonnt hät Somme un Winte, en hondet Johr!  
Ävve onge de Böhm es et och wie en ene Kerech. —  
Stell! De Kuckuck löck!  
Zehn-, elef-, zwölfmohl. Dann lävve me lang!  
Wat ruusch doh, Jüpp?  
Huh, ich senn bang!  
Un wat dat düste witt. ———  
Komm, Könk, bruchs keen Angs ze hann,  
ich nämmen dich en de Ärm.  
Och e Bützje? Luuet ens fott, ihr drei.

Johd'er met nohm Ravensberch  
bei dem schüüne Wedde?  
Pette, Jössep, Kättche, Märch,  
donn us jet veträdde.

*Märch* — Maria  
*Schüür* — Scheune  
*Kraadepöölche* — kl. Gewässer mit  
Kröten  
*Küblingsköpp* — Kaulquappen

*Jevvel* — Giebel  
*Kningsköttele* — Kot der Karnickel

*Domme* — tu mir, gib mir  
*Faarn* — Farn  
*Käuedche* — Eichhörnchen  
*Dännemöpsje* — Kiefernzapfen  
*Schüürendenn* — Scheunenboden

## Ne Fifold

Wat hänk, met jeknickte sechs Jröötebeen,  
dann doh en de Eck füür dem Dörpelsteen?  
E Blatt, janz veschlesse vom Hervs zevüür?  
Jebläderte Färv von de Ovverdüür?

Nä, süch, doh senn Strich joh, ne helle Tupp,  
un Rebbe noh Mooß, ne Boogekupp!  
Dat es jar ke Hölzje, dat es e Liev,  
ne Kopp vürre dran un zwei Ooge pief,  
un fäddechesdönn stonn zwei Föhle dropp,  
die fädderen hörsch at ens av, ens op.  
En Uhrfäddezong es zom Schnööse praat.

De setz seche heh, weil op Sonn hä waat.

Met Zedderen, luur ens, jetz pompe stief  
voll Luff sich de Rührche bes deev en't Liev.  
Nu stippe sich huh, deht ne Stelzeschrett,  
un noch eene, wegge, du jlöövs et net:  
hä well en de Sonn, op de wärme Kant.  
Su schöggelte huh sich elans de Rand.

Jetz mosse sich räste un hutsch wie duut  
em Sonnejebletz wie en Kösch von Bruut.

Nu luur! Ich senn platt! Doh, jetz klappe op!  
Wat Färve! Wat blänke! Un Sammet drop!  
Su kollschwazz un wieß un säusblootruut!  
E Pälzje om Rögge, un jröön de Schnuut!

Un op klappe, zoh wedde. Op. Un süch!  
Deht huhhöppe, faldere, zack, un flüch  
nohm Jaade un danz öm de Quätscheboom  
un dervelt erav op en Kettebloom.  
De Rössel jestipp en de Blöötesaff  
vier-, fönnefmohl, un noch ens, für neue Kraff.

Dann fottjeschnöcks, huh, en de Sonn, de Wönk  
un net mieh ze sehn es dat Sommekönk,  
dä Fifold, em Booch heesche „Admiral“.  
Mich freut, datte bonk es, mir es ejal  
de Name. Un sühsderen fern un noh,  
dann loß dr jesahnt senn: de Mai es doh!

*Jrööte* — Gräten  
*Dörpel* — Türschwelle  
*Ovverdüür* — Oberteil der zweiteiligen  
Haustür

*pief* — starr glänzend  
*hörsch* — leise, vorsichtig  
*schnööse* — naschen

*schöggele* — schaukelnd bewegen  
*hutsche* — hocken  
*Kösch* — Kruste

*Schnuut* — Mund

*Kettebloom* — Löwenzahnblüte  
*Wönk* — Wind

# Uss Zoort Lök · Mundartliche Geschichten

Von Willy Neußer

## Ohm Kohned

Jong, wat trook et von Menge schwazz erahn, äs wenn et Wöllef hätt kotze welle.

Et wor de ävve och en Luff jewärs de janze Daach, schwööol un möllechich, et wor eenem janz benäud em Kopp.

Un nuh wor op eemohl de Sonn fott, un de Mösche quengelten sich onger et Schüürendaach en de Retze, de Katz vertrook sich onge de Ovve, de Hohnde dauten sich jäjenseggich de Leeder erop, un de Pircheleboom nävverem Schopp leecht de Bläade hange für Hetz un weil kee Lüffje jink. De Könge woren jrad esu zerwersch wie de Ahle.

Dem Ohm Kohned leev de Schweiß de Stiern un de Nacken erav, wiehe met de Schörreskaar voll Knollebladere noch jrad em Drüüjen erennkoohm. Hä luurt jäng noch noh, ov de Schaaf jood op de Poerz wor un de Lade örndlich enjekrämp, un jrad, wie e erennkoohm, schmess de irschte Weddewönk ene Hoof Stöpp hengerem en de Stovv.

„Datt jitt e jehüürich Wedde“, meente füret Jriet, „jood, dat ech et Foode für denoh un mornmorje noch erenn hann braht“.

Hä satz sich henge de Desch un nohm de Kleenste, et Minche un de Schäng, op de Schuuf. Et Lisa un et Drautche hutschden met ahnjetrockene Been op de Bank, et Annche koohm jrad de Trapp erav jehöpp, de Will wor met Zang un Schruuveziehe am piddele, et jong Jriet hatt e Körvje Erpel vüür sich op de Erd stonn un e Emmeche met Wasse un wor am schälle. Nur de Jakob wor noch net deheem, der wor et zwätte Johr en de Liehr un hatt irsch öm sechs Uhr Fierovend.

Et wurd esu stehendüste, dat et ahl Jriet de Steenollichslamp von de Wand nohm. Et stooch se ävve net ahn, et scheck et Annche flöck de Kerz holle, die neu, von Kävve die.

Nävverem Kröcks en de Eck hing och ene Krockwösch. Et nohm e Strüüßsche Kröckche un laacht se nävve de Kerz.

Op eenmohl klatsch et wie met Emmere ahn de Fenstere, et bletz emme mieh, et rappelt, dat mer et ongerem Hengersch fohlt. Et ahl Jriet fing ahn de Ruusekranz ze bädde, de Kohned un de Könge bäd'ten met, et jong Jriet hat opjehuurt Erpel ze schälle.

De Kerzeflamm schöddelt sich un krömp sich, wenn de Wönk lans de Jevvel dauht. Et kraach e paarmol jehüürich, ävve „et mirschte trick op Luhme ahn“, säht de Ohm.

*Kohned* — Konrad

*möllechich* — trüb, *benäud* - benommen

*quengele* — drängen

*Pirchele* — Pfirsich  
*zerwersch* — quer (Zwerchfell!)

*jäng* — eilig *Schaaf* — Riegel

*Steenollich* — Steinöl, Petroleum

*Kävve* — Kevelaer

*Krockwösch* — Krautwisch, Feldblumenstrauß, der gesegnet wurde als Feuerschutz

*Jevvel* — Giebel

Noh ener vierdel Stond leecht et Bletze noh, me huurt et nur op de Bösch ahn noch jett knorze.

Et Jriet maht de Fenstere hengewedde op, mer konnt bahl net öhdeme. Dat dächt jood, dat et jett köhl erentrook.

De Ohm stonnt op, jink an de Hooke, wore seng Täscheuhr em joodde Kammesohl hatt, trook se eruus un säht: „Fönnef op halleve sechs. Et es noch ze fröh füür ze foodere. Kott, Köngde, ech donn üch noch jett vezälle, bes et ophüürt ze siefe.“

*Kammesohl* — Rock

„Au joh, Ohm Kohned! Doh noch ens vezälle, wiere en de Fuuhr jeläje hatt!“ Un jlich bäddelten se all dorjeneen. „Es jood, Köngde, ävve irsch donn ech me de Pief stoppe, ech hann richtije Schlieh-zäng. — Will, holl at ens en Fimp!“

*Schlieh-zäng* — Zähne, die sich stumpf anfühlen, als habe man Schlehebeeren gegessen

Dat dächt der, un hollt och die lang Pief vom Hooke un de Tabaksböggel, un stopp en Hand voll Strangtabak en de jruuße, jeblöömte postelinge Piefekopp un heel dem Ohm de Fimp drop. En fönnef-, sechsmohl trooke, daut mem Domme de Jloot deefe un klapp de Piefedeckel zo.

*postelinge* — aus Porzellan *Fimp* — Fidibus

Dä Quallem roch schärf un sööß, un e Deel dovon trook dorech de Kerzeflamm, die noch emme ahn wor.

Nuh dorf de Schäng se uusbloose.

„Jetzt modde ävve vezälle“, eggelt et Drautche, un de Moode, et ahl Jriet, schöddelt mem Kopp un laach.

*eggele* — eklig, unmutig sein

Dat Stöckelche hattense doch mennestens at en hallev dotzendmohl jehuur. Ävve alles wat räch wor, de Ohm konnt et och vezälle, dat mer et net leed wurd. Doh soch me de Bletz en de Stovv erenjöcke un konnt mem Kopp drahn stuuße, su konnte de Wolleke met de Häng en et Jehööch wääje!

*Jehöösch* — Wohnung *wääje* — bewegen

Hä trook noch ens ahn de Pief un fing ahn:

„Dat wor nöngunnöngsich, wie de Schäng op de Welt wor komme. Un von däm Matthesdaach ahn hatt et et ganze Fröhjohr su jood wie nöx mieh jerähnt bes op e paar Schüürche Ängs Aprell. Et Kohnr schoß net richtich en de Hüh, et Heu joov bloos eene Kodde, wore söns zwei stonnten, me krääch de Erpel net örndlich jehööv, su hatt wor de Erd, un de mierschte Löck em Dörrep haaten op Johannesdaach kenne Droppe Wasse mieh em Pötz un mohten et emmerewies heh bei uus ode bei e paar andere holle jonn. Sujaar de Werthsbaach wor ratsch drüh, un die vell Veeh hatten, mohten e paarmohl den Daach met de Addelskaar noh de Aache fahre.

*Mathias*, 24. Februar

*Kodde* — Kotten, Haufen

*Johannes* — 24. Juni

*Pötz* — Brunnen

*Werthsbaach* — Bach durch den Werth, floß früher vom Burgweiher zum Hofweiher

*ratsch* — völlig

*Addelskaar* — Jauchewagen

Mer hatten at düchtich jebädd öm Rähn, mer woren all met de Prosejohne jejange, ävve jenotz hatt et nöx.

*Prosejohne* — Prozessionen an den drei Tagen vor Christi Himmelfahrt

Jozecks dächt de Pastuur füürschlaage, mer söhlen nohm Juddes Thaddäjes jonn. Wer ävvens kruffe konnt, jink met, vier Stond hin, vier Stond herr. Un wat woren doh Löck en Heestebacherott!

Drei Daach späade, op Henderich, joov et richtichewäch et irschte Jewedde un en jehüürige Schuur Rähn, un all laachdense wedde em Dörrep, un de Pastuur säht: „Na seht ihr, was das Beten hilft, nun vergeßt auch das Danken nicht!“

*Heinrich* — 14. Juli

De Pänz tratschten met de bläcke Fööß en de Pöölche eröm, un die Ahle hätten et et leevs och jedonn.

De andere Morje joov et en aller Herrjottsfröh — ech wor noch em Stall — wedder e Wedde. Dat duuhrt bes bahl Mettaach. Un dann räht et un räht et, op Kobes, op Anna, op Laurenzies, op Hippoletes, op Maria Himmelfahrt.

Mer konnt keene Schloocht mieh ussem Jaade holle un keen Erpel mieh kaaschte, su sief et alle Daach. Un dann blevv et doch ens ene Nommetaach drüh, un de andere Morje däht de Sonn schenge, un ech säht für de Wellem, ühre Vaade sellich, wie hä noh de Bahn jink: „Ech maachen hück am Heenestöck de Klieh av.“ Dat däht ech. Un et wor der en Hetz, dat de Kröh jappden, un esu schwöhl, no all dem Rähn, et Hemp kläv v eenem am Liev.

Et nommetaachs jink ech de Klieh wänge. Ävve et wor esu en jrooch Looch, dat me de Sonn kohm sooch. Wie ech de Klieh ferdich jewandt hatt, daach ech: „De dees et bäss de Klieh at op Kodde läje, et jitt seche wedde Rähn.“ Wie ich ferdich wor, sooch me keen Sonn mieh, ävve och keen Wolleke, esu möllchich wor et.

Un dann fing et op eenmohl ahn ze klatsche. Ech schnapp me de Kabass met dem Kaffejescherr, me Wöbche un de Jaffel un jöck op heem ahn. Näh, Köngde, wat wor dat am schödde! Et Wasse leev me en de Uhre eren un ahn de Naas wedde eruus, un meng Pief leef övve un de Tabak schwomm fott.“

„Ohm Kohned, moß de esu leeje, wat sollen de Köngde von de denke!“ säht et Jriet. Hä moht jriemele.

„Wegge, Ohm!“ bäddelten die Weechte un zabbelten met Ärm un Been.

„Ija. Wie ech en hondert Schrett wor jejange, bes bahl an die kromm Ech: ratsch-paaf-schnädderängtäng-bomm-kladderadatsch!“ —

Nä, halt, dat moß ech Üch moole: de Ohm wor langsam, bahl ohne dat mer et jemerck hatt, datte sich bewäje däht, opjestate, hatt sich piel huhjeräck, de Ärm un de Füüß övve de Kopp jehovve bes bahl ahn de Stovvendäck, hatt sich wie der Bletz wedde op de Stohl falle looße bes bahl mem Kopp op de Deschplaat un dobei de Füüß erömschlaage looße, seng ‚ratsch-paaf-schnädderängtäng‘ jebrollt, jekreetsch, jerommelt un met de flache Häng op de Desch jeklatsch, wie et de bäste Knöppelchesjonge net jekonnt hätten, dat de Köngde ne Krieh dähten, de Will de Zang falle leecht un de Kaffe kann ahn ze schörvele fing.

Janz langsam satz sich de Ohm wedde zeräch. De Köngde trauten sich net ze öhdeme un hatten de Ooge su jruß wie Naachsühle.

Seche en Dotzend Hätzschläch lang blevv de Ohm stell, dann hollte deaf Luff un säht:

„Hellije Antonnijes, Höllep, esu noh hatt et me Läbdaach noch net bei mer ennjeschlaage. En Flamm schlooch en de Eech huh un jink wedde uus, et stonk, äs wenn de Düüvel nävve me en de Erd wör jefahre, ech wor stief wie ne Hauklötsch un leecht alles falle, wat ech en de Häng hatt. Un dann schlooch me de Haagel öm et Liev, un Bletz un Donne an eenem Stöck. Ech leecht mich en en Fuuhr vom Braschosse Hannes sengem Erpelsstöck falle un verkrovv mich onget Jelööv.

Klatschnaß wor ech joh su att. Datt ech nuh och noch voll Dreck wurd, wor mer ejaal. De Haupsaach, de Bletz konnt mich net mieh sehn!

*Jakob*, — 25. Juli

*Anna* — 26. Juli

*Laurentius* — 10. August

*Hippolytus* — 13. August

*Maria Himmelfahrt* — 15. August

*kaaschte* — hacken *siefe* — ununterbrochen regnen

*Hennestöck* (in der Nähe des Aggerfreibades) — Flurname

*jrooch* — grau, bleiern

*Kabass* — Tragetasche aus Stoff

*Wöbche* — leichte Jacke

*jriemele* — verschmitzt lachen

*piel* — senkrecht hoch

*Knöppelchesjonge* — Trommler

*Naachsühle* — Nachteulen

*Höllep* — Hilfe

*Jelööv* — Laub, Kraut

De Rähn schott un schott. Ech hann üch die Plaaz joh att jezeech, woh ech jeläjen hann. Doh es joh esu en kleen Kuhl em Feld.

Et duuert net lang, doh merk ech, dat ech bahl janze em Wasse looch, et leev me övve de Maue, ech mooht de Kopp huhräcke, un dann moht ech en däm Mudd en zwanzich Schrett vüürahn kruvve, söss wör ech am Äng och noch ratschewäch versoffe.

Su siehr wie et komme wor, trook et Wedde och wedde fott, de Aache erop. Ech leecht Javvel, Pief un Kabass en däm Pool un schlapp heem.

Wie ech lans et Looch op de Schossieh kohm, stipp de ahl Ingerberchs Moode em Fenste. So schlooch de Häng övverem Kopp zesamme un juuhz: „Marriandeies, bess dur dat, Kohned? Du süühs uus, äs wenn de us em Maieschlämmche kööhms!“

„Ija“, säht ech, „siehrnöhks, ech hann de janze Zeck beim Braschosse Hännens en de Erpel jelääje. Un dat kann ech der saage: ech bädden net mieh öm Rähn, un wenn de Schöern flamme! Doh kannste Jeff drop nämme!“

*Maue* — Ärmel

*Looch* — Im Laach, Flurn.

*Schossieh* — Chaussee, Fft.-str.

*Ingerberchs Moode* — Mutter Ingerberg-Lohmar

*juuhze* — kreischen

*siehrnöhks* — beinahe

*Schöern* — Erdschollen

### Oma, wie kamme nur!

Et joov noch net ärch lang Radio, un wennich Löck en Loor, Spich, Droosdorf ode Ovveloor hatten ere eent met Lautspreche drenn, wie ze Ovveloor de Schenkelberchs Oma nöngsich wuurd.

Wer kann de Schenkelberchs Oma net!

Mieh wie et haleve Dörep quengelt sich en die paar Hüüse, wo et Radio joov, öff stonnten en janze Heerd Minsche esujar für de wegg oppe Fensterere für ze luustere.

De Oma wuurd nämlich em Radio jenannt un kräch e Ständche jebraht.

Wöör se net eso schrömpelich em Jeseech jewers, ich jlööv, se wöör su ruut wurde wie beim ierschte Bützje, esu däht se sich scheniere. Se woor och en de Zeidung komme, un doh hatt drennjestande, dat se fröh ihre Mann hatt veloore un ihr zehn Pänz alleen hat jruußtrække mösse. Froocht mich, wie se se emme satt hatt krääch! „Ävve ich hann mich net ongekrieje looße!“ säht se jedereenem, der ess noh ihr kühme kohm.

Wie se von esu enem Zeidungskerl jefrooch wuurd, wie se sich dann föhle däht met nöngsich, jriemelt se un säht: „Ovven eröm wie nöngsehn. Wie nöngsich blos ongeneröm. De Been wellen net mieh esu rääch!“

Un dann schöddelt se mem Kopp un säht, wie och de Pastuur kohm für se ze jratuliere un de Börjemeeste: „Nä, nä, wat maht e wäjen mir doll ahl Hohn e Spell! Ess dat dann nühdich? — Marie, donn denne Heere noch ene Konnjack, un mir och eene, ävve net ze voll!“

Wie et Marie usjeschott hatt, meent et: „Bes de noch net ze mööd von däm Zortier? Dann donn doch noch ens vezälle, wie de us Köngde et ierschtemol Ies jekoof häss!“

Dat nexnotzije Jeseech von de Oma hätt er sehn mosse! Se schlooch de Häng für de Ooge, äs wenn se sich schamme däht, schöddelt mem Kopp, äs wenn se et seleve noch net bejriefe könnt, un laach stell en sich erenn, dat ihr de Buch wägele däht.

„Pross, Oma!“ säht de Pastuur, „op noch e paar Jöhrche!“ — „Su Jott well!“ — „Wie woor dat dann met däm Ies?“

*quengeln* — sich drängen

*luustere* — lauschen

*schrömpelich* — eingeschrumpft

*jriemele* — verschmitz lachen

Se kipp de Konnjack, läck sich de Leppe, laach noch ens un fing ahn:  
„Eja, dat moß esu nöngsehnhondetfönnf ode sechs senn jewers,  
wie usse Hännes ze Bonn bei de Husare deene däht, un de Jered un  
de Franz och at en de Liehr wooren un et Marie un et Annche en  
Stellung un ich me e klee wennich besse helepe konnt.

Doh hatt ich dem Hännes ene feine Kastekooche jebacke un wohl  
em dän bränge, wiere Namensdaach hatt. Ich leef nohm Ässe de  
Schossieh noh op Loor ahn, dorech Eicheme op Monderp loss.“

„Wie? Ze Fooß?“ frooch de Börjemeeste, „Woröm dat dann? Woröm  
sett Ühr dann net met de Strooßebahn jefahre?“

„Leeve Jong“, joov de Oma zor Antwoort, „du häss en Ahnung!  
Ierschens joov et noch jar keen Strooßebahn, die hamme iersch  
dröcksehn kräch, un zwättens wör mer dofür och et Jeld ze schaad  
jewers.“

„Un doh set Ühr der janze Wääch ze Fooß jejange? Bes noh  
Mongderp?“

„Ija. Un für övvezesätze op de andere Segg vom Rhing wohl der  
Kerl fönnf Penneg hann! Ich konnt däm Labbes saage, wat ich  
wohl, ich moht e Billjättche lüüse. Ävve von Rhingderp bes noh de  
Kasern senn ich wedde ze Fooß jejange.

De Hännes kräch wäjen mir un weil e Namenstaach hatt an däm  
Nommetaach e paar Stonnt Stadturlaub, un doh sem mir zwei met  
de Perdsbahn bes nohm Maat jefahre. Un doh hamme us fottejra-  
fiere looße, doh, dat es dat Beldche vom Hännes von däm Daach, un  
me senn zesamme op de Ahle Zoll jejange, un dann hätt me de  
Hännes e Ies jekoof.

Ich moß mich schamme, dat ich et saage, ävve wat hätt dat jood  
jeschmack! Ich hätt ere et leevs zwei jelötsch. Ävve de Hännes hatt  
ere esu at e jruußet für fönnf Penneg jekoof.

Für et Oovendesse mohte wedde en de Kaseern senn.

Net weg dovonn es en Wiertschaff. Un doh hing e Scheld op de  
Düür. Doh stonnt drop: „Kaffee, Kuchen, Getränke, Eis.“ Ich hatt  
et mettachs, wie ich doh lans wor komme, jedaach: nu luur, su  
träcken se dänne ärm Zaldate de Jrosche us de Täsch!

Wie ich ävve jetz dat Woort „Ies“ loos, konnt ich net mieh andesch.  
Ich jink erenn un hann für zwei Jrosche op eemol Ies jekoof. Stellt  
üch dat für! Für zwei Jrosche! Ich hätt et och net jedonn, wenn ich  
net an de Köngde jedaach hätt!“

„Wie? Hatt Ühr dat dann net selvs jejesse?“ frooch de Börjemeeste.

„Bes de ahdich! Dann hätt ich mich joh duud schamme mosse!

Näh, ich krääch dat Jescherr en esu e Pappdeckelsdöppche, weil ich  
jesaat hat „Sett eso jood“, wie dat Frauminsch en der Wiertschaff  
mich froogen däht: „Für mitzunehmen?“

Wie ich drussen woor un jewess, dat mich keener sehn konnt, däht  
ich dat Döppche ongen en de Dobbelrock, der bes op de Schohn  
jink. Dodren konnt me joh jood esu jet Kleenichkeete eröm-  
schleeve.“

De Oma schöddelt wedde mem Kopp, wie se sich beim Vezälle  
wedde dat Döppche vestäche sooch un drahn daach, wie et wegge  
jink.

„Drönkt noch ess!“ meent se un vezohl wegge.

„Jung, et woor jood wärem, un de Wääch wurd me ärech lang bes  
nohm Böötsche. E parmohl daach ich: wat klävv de doh esu an de  
Been? Ävve ich sooch nix, wenn ich erav luurt. Un wie ich dorch  
Mongdörp woor, hätt ich et leevs jet em Schossiejraave jeräss.  
Avve et jink seche at op nöng ahn, et woor kee Minsch mieh em Feld.  
Von Eische me ahn jink et wedde besse. Ich stalt me die Jesechte  
von de Köngde füür, wenn die dat Ies soochen!

*abdich* — artig vernünftig

*erömschleeve* — herumschleppen

*räste, jeräss* — rasten

Un dann woor ich deheem, un die Weechte sprongen öm mich eröm un froochten un froochten. „Kott, setz üch et iersch es all öm de Desch, ich hann üch och jet Feines metbraht!“ säht ich.

Un wie se dat endlich ferdich hatten braht, pack ich menge Rock, dräht en jet noh vürren, fohlt en de Fahl, — wat woor dat doh esu naaß? Un klävverich? — Doh woor dat Döppche.

*klävverich* — klebrig

Ävve esu leech! Jösses, wat es loss? —

Ich zortiert et erus, dat Papier drömeröm janz opjeweech un ruut un brong. Ich maht et av: et Döppche ratsch läddich! Keene Jrömmel mieh dren! Bloss noch e klee besje Bröh om Bodden! Un für zwei Jrosche! Zwei Jrosche!

Et jink me ronk, ich leet dat Döppche op de Desch falle, mich selevesch op ene Stohl, de Köngde mosse duudveschräck wuorde senn, su hatt ich de Ooge opjeresse. Ich wees noch, wie et Kättche reef: „Mama, Mama, wat es de?“

Dann hann ich de Kopp op de Desch kippe looße un jekresche, — hüürt, su hatt ich net mieh jekresche zeck dat ich menge Pette bejraave hatt! Zwei Jrosche!

Un ich doll Hohn schleefen en der Hetz e Döppe Ies em Rock ze Fooß von Rhingdörp noh Ovveloor!

Un jetz woor ich em Radio un en de Zeidung! — Marie, schött noch ens enn!“

„Dowäjen brutt Ühr Üch ävve doch net ze schamme“, säht de Börje-meeste.

„Dat saagen ich och luute“, meldt sich de Jered zo Woord, „ävve wat me de Motte vörch Johr de Somme ferdich hätt braht, wie se en aach Daach bei mir em Spich woor, dofüür hätt me nem Weech de Hengesch jehaue.“

„Su? Es se dann och en däm Alte noch nexnotzich?“ frooch ene vom Besuuch.

„Oh joh, un dat net ze knapp“, säht et Marie. „De mierschte Zeck semme joh fruh, dat se emme noch esu jood dobei es un noch esu jern laach. Ävve werklich, dat Stöckelche vom vörije Somme, dofür hatt se Klöpp vedeent!“

„Wie woor dat dann? Wat hätt se dann doh ahnjestallt?“

„Joh stellt üch füür“, fing de Jered ahn ze vezälle, „nohm Esse hatt se sich jet für ene kleene Enonde en de Sessel jesatz, woor ävve beizegge wedde opjebrasselt un hatt für meng Frau jesaht: „Draudche, ich jonn me jet de Been vetredde!“

*Enonde* — Mittagsschlaf

Dat woor nix Extrasch, dat däht se döckesch.

*döckesch* — oft

Wie ich öm vierdel op Vier von de Fabrik komme, es se noch net wedde doh. „Ich hann der en Onrauh“, säht et Draudche, „Mann, du moß ens luure jonn. Sätz dich op et Ratt un fahr ens heh em Bösch un öm de Hollsteen eröm.“

Dat däht ich. Nöx von de Mamm ze sehn.

„Donnerkeil, die witt doch net heem nohm Ovveloor senn jeloofe?“ saagen ich, „Ich moß ens luure jonn.“

Doh woor se och net jewers.

Dann moht me menge Quass, usse Johannes, noch sööke helepe. Me senn janz Spich un de Bösch bes en et Kleiloch avsööke jefahre. Keen Oma ze sehn.

Wie me noch es op Droosdorp ahn wohle fahre, sehn me se dohengen ahnkomme. Ävve wie!

Se woor — nu luurt, jetz laach se och noch wedde, su e Oos es die noch op ihre ahlen Daach! — de Schossieh eravjedötz op Droosdorp ahn. Un op eemohl hatt se ahn de Polleve jestande un de Elektrische komme sehn.

Weil se woß, dat se e paar Jrosche en de Manteltäsch hatt, woor se



enjesteeje un wohl jraad es noh Sieborch nohm Maat fahre. Wie se doh en Zeck eröm woor jeloofe un an de Schaufenster jeluurt hatt, woor se hungerich wuurde, hatt sich e paar Moppe jekoof un henge ene Huuseck jesse. Un dann feel ihr en, dat jetz et resslische Jeld net mieh recke däht für heemzufahre. „Och, dat maht nix, dann jonn ich ävven zu Fooß!“ hatt se jedaach un woor op heem ahn jetippelt. Met nöngunachzich Johr! Stellt üch dat füür!

Weßter, wie weg se kommen es? Bes ahn de Uhlerott! Ävve dann wuurd et ihr doch selvs jet unheimlich. — Wat häs de doh jedaach, Oma?“

De Schenkelberchs Oma jriemelt at wedde un säht, esu leis wie e schämlich Könk: „Ich hann jedaach, wie ich doh erav op de Aache ahn en dat Loch sooch un kee Minsch mieh op de Strooß: Huh, wenn jetz ene fremme Kerl kütt un well de jett un süht, dat de keen Zäng mieh en de Muhl häss un witt falsch un well Jeld hann un fenk dann blos noch sebbe Penning, dat kannste däm net ahndonn. — Un mir donn och de Been ze wieh.“

„Nu hüürt üch dat ahn!“ laach jetz och de Jered, „Weßter, wat se doh jemaht hätt?“

Wie ze noch am övveläaje woor, wat se maache söhl, kütt vom Uhlerott erus ene Mann met enem Heuwaage, weßt er, su ene kleene Leederwaage. Dänn hätt se ahnjehaue, hätt sich bei däm op de Heuwaage jesatz un sich esu, de Been hengen eruushange, bes siehröhks heemfahre looße! Un der Mann wohl noch net es e Drinkjeld hann!“

„Dat woor och net nüüdich“, säht de Oma, „ich hann de janze Zeck füren Ruusekranz jebett un em Wetz vezallt!“

„Pross, Oma!“

## Un du küss doch erenn!

Auwei, wat hät de Kobes wedde schwer jelaade!

Hä kütt vom Hohns Billa eruusjeschöggelt, schröömp quer övve de Schossieh, besse beim Möllech Annche am Trappesteen hange blieht. En zwei, drei Menutte knoorze eröm, dann schluffe öm de Eck vom Hellijehüüsjen de Veehjass erenn. Do zöggelte lans e Stöck Zong, besse an de Ziejelsteenmuur kütt.

Do mosse räste un sich de Pief stoppe. Alle Oogenblecks meent me, hä däht en de Knee knicke ode hä feel janz öm. Ävve met vell Jesööks un Brommere hätte jozecks jätt Tuback em Piefekopp, hätt esujar e Schwäfelche am brenne un waggelt met dem Flämmche esu lang eröm, besse verhafftich Quallem trick.

Jetz kütt et schwerzste Stöck vom Heemwäch. Träck es ene Pooezeschlüssel quer ahn de Bozzetäsch eruus! Un wat es em Düstere hengen un füür?

De Jass erop es et esu düste, dat me bahl nix mieh vom Kobes süht. Ävve me хүrt en. Av un zoh kreetsche mem Schlössel lans de Muur, die bahl fuffzich Schrett lang es un wo iersch kurt vürem Äng de Poorz kütt.

Alle Oogenblecks knoorze: „Un du küss doch erenn! Un du küss doch erenn!“

Länge wie en vierdel Stond duurt et nömmen, bes et ene Bomms jitt. Jetz konne me opöhdeme, de Kobes hätt et Poorzeloch fonge. Noch e Vaterunser lang, dann knaatsch et Schloß. Hä — de Schlössel — kohm doch erenn!

De Kobes witt wahl och noch op de Strühsack fenge!

Ävve et hät em och noch nex jeschaad, wenne de Naach nävverem Kningsstall liejen es blevve.

Moppe Hefeteilchen

recke — reichen

du küss — du kommst

Hohns Billa — Sibylle Hohn, aus der Gastwirtschaft Hohn

(Hohns Jeloog!) = Sanderhof

schrööme — eilig gehen

Möllech Annche — Anna Müller, alte Troisdorferin

knoorze — knurren

Veehjass — Viehgasse = Römerstr.

zöggele — sich langsam vorwärtsbewegen, zögern

Pooez — Pforte, Tür

kreetsche — kreischen

opöhdeme — aufatmen

## Et bletz

Et Jriet un et Dröck senn en Lehre alt un jries wuuede. Aach Köngde hätt et Jriet jruußjetrocke, sechs et Dröck. Un ihr Kerls liejen at lang om Kerchhoff, un de Köngde senn ussem Huus un vehieroot. Su hann die zwei vell Langwiel, wenn se och, wie et Jriet, bei ene Doochte, ode om Hoff, wie et Dröck, vesorch senn.

Vell arbeede konnen se och net mieh. De Knoche senn inne at jood stief, su dat esujar et Strömpstrecke at schwerfällt, et Dröck hüürt emme schlächte — „nä, nä, Jriet, vom Pastuur senge Prädich hann ich wedde jeen Wooed vestande“ —, dem Jriet fällt et Loofe schwer.

Su donn se et leevs jet setze un klaafe. Se bruchen nämlich blos schräch övve de Jass für ze Nohpere.

Es et Wädde schön, deut et Dröck mierschtens erövve nohm Jriet, e Dooch öm de Kopp, no vüüren jeböck, de Häng om Röck.

Jewöhnlich setz et Jriet at parat op ihre Plaaz: zweschen Huus un Schüür jeht et e wennich berchahn enn en Spetz, en die de Sonn net ze jählich un de Wönk nömme kütt. Doh litt en ahl Walz, ohne Böhm, ävve noch mem Setzbrett dropp. Onge dofüür es ene Klotz jestipp, dat de Walz net eravrollt. Et Jriet hät at zwei Kesse doh lieje un setz zeräch.

„Saach, Jriet“, schraatelt et Dröck, esu hatt — weil et seleve su doof es —, dat meret bes ahn de ahl Scholl hüürt, „uss Hohnde läjen den Daach jeen Ei!“ Et knöddelt sich seng Koppdooch ongerem Kinn neu, wösch sich met de Mau et Dröppche von de Nas un knaatsch: „Jriet, du häs me doch jeroode mem Opjesätzte. Meng Jeecheltekornde senn esu jazz wie en Sau! Un usse Pette — de Knääch — dat Kerke, hät me wedde de janze Schloht freife!“

Et Jriet trüüs et, dann hät et seleve jett ze kühme: „Dröck, de Katz hät me at wedde zwei Pöllche jehollt, un eent hät de Klotz duudjetredde. Jetz hann ich blos noch eent un vier Hahneküche, ich jlöven, ich muß noch en Klotz setze.“

Wo et bletze blieht? — Ah su, et kütt kee Wedde.

Ävve wenne henge de Schüür luuren dächt, wößt er, wat jlich kütt. Doh hutschen nämlich de Hannes, de Jüpp un de kleen Willche, su en ellef-, zwöllevjöhrije Saupänz. Die hann am Oovend zofür ene Näjel en de Klotz onge de Walz jeschlage, ene dönne Droht dranjebonge un fein strack öm de Schüüreneck jelaht. Jetz träcken se dodrahn, un ganz pö-a-pö rötsch dä Klotz op Segge.

Se konnen jrad noch op de andere Stroßeseck spreng un esu donn, äs wenn se de Schossieh eropköhmen.

Doh rötsch et Dröck net enem kleene Fupp jet mieh noh hengen op dem Setzbrett, dobei kritt de Walz ene kleenen Däu noh vüüren, et Jriet un et Dröck kriegen et Övvejewich un kippen met enem haade Juuz noh hengen erav en de Honnichnessele.

Luurt net, wie de Walz fürahn rollt, dat andere Beldche es vell schüüne. Die zwei Wieve werfen de Been en de Hüh, un doh bletz et, un dat net ze knapp. Se hann allebeeds wieße Lengebotze ahn met lange Been un Spetze, ongerem Knee jebonge. Un jood em Foode senn se hengeneröm och noch allebeeds. E Beldche! Doh jövt eret haleve Dörp für!

Un wat die schänge konne! Schaad, dat me dat net schrieve kann un dohzomohl et noch kee Tonband joov.

Et hät joodjenge, die zwei hann sich net wieh jedonn.

Ich weeiß, ich hätt jehüürich Klöpp vedeent. Ich donn et och net wedde, hellich un seche!

*klaafe* — Schwätzchen halten

*schraatele* — schreiend reden *hatt* — hart, laut  
*ahl Scholl* — Alte Schule = Volksschule  
Kirchstr.

*knaatsche* — weinerlich reden  
*Jeecheltekornde* — Körner gegen Gicht =  
schwarze Johannisbeeren  
*jazz* — bitter

*Pöllche* — weibliche Küken *Klotz* — Glucke

*Wedde* — Wetter = Gewitter

*Däu* — Schub  
*Juuz* — Jauchzer, Schrecklaut  
*Honnichnessele* — Taubnessel

*Lengebotz* — Leinenhose

## En düür Flööt

Dr Herr Temp es nävverahn neu ennjetrocke.

Nä, wat es däm seng Madamm fürnehm! Die es us der Jroßstadt un kalt nur Hochdeutsch un deht sich enen Döhn ahn.

„Enein, das paßt gar nicht zu uns, aber mein Mann ist Biamter und mußte ja dienstlich hier auf das Dorf ziehen.“

Hengerem Huus es vell Plaatz, un der Herr Temp schaff sich Jäns ahn und löht se frei erömloofe.

Wie de Schäng des Nommetaachs von de Fabrick kütt, senn all Schlooteplanze fott, de Öllichspiefe plattjetrodde, de Mähl avje-weed. Dofür liejen en Dotzend Köttele doh.

De Schäng jeht nohm Herr Temp un säht: „Ihre Jänse waren in meinem Jarten.“ Der säht: „Machen Sie einen Zaun drum.“

Der anderen Daach stonn vom Schafuur blos noch Stömp, de Eerze senn halev docheneenjeröpp.

De Schäng schriev ene Breef: „Nicht ich muß meinen Garten einzäunen, Sie müssen Ihre Gänse festhalten.“

Die Jäns maachen de Kolleraaveplanze praat, probieren de zwätte Satz Schloot. De decke Bonne träcken se nur uus.

De Schäng jeht nohm ahle Duur. Der es Flurschötz un hätt selevel Vee un Jaade.

Der Herr Temp nimmp kenne Roht ahn. Dowäjen kritte am fönfte Daach et ierschte Protekoll von eener Mark.

„Du bruchs net jeden Daach ze komme“, säht de Duur für de Schäng, „wenn de mich en mengen Jaade süüs, flööt dreimohl dorech de Fengere, dann schrieven ich ere wedde eent. Un jedesmohl doppelt esu düür wie dat zefüür“.

Fönnef Jäns hatte. Vierhonderteenunachzich Marek un ene Zong hätte bezahle mosse, der Herr Temp.

Wat koss een Jans?

*düür* — teuer

*sich enen Döhn andonn* — übertrieben vornehm tun

*Mähl* — Gartenmelde

*Eerze* — Erbsen

*Kolleraave* — Kohlrabi

## Die jeblötschte Sau

De Tant Jriet wohl schlaachte.

En de letzte Daach hatt at menniche Sau em Dörrep ihre letzte Krieh jedonn. Meertesdaach woor eröm un et Wädde kalt jenooch.

Et woor noch Zeck bes Chressdaach für de Speck un de Würsch en et Röches ze hange. Un alle Daach moht de Bläesch Pette en Sau avmorkse, övveall roch et noh Wurschbröh un Wellflesch un Wurschkröckche.

Wochelang hatte mir Pänz at jebädelt: „Tant Jriet, sähs de me och Bescheed, wenne schlaachte doht? Kriejen ich düs Johr de Bloos? Darf ich et Stätzje hann?“

Weil me de Somme fließich Thymian, Salbei, Melisse, Dausend-jöldekrock un wat söss noch jebbruch wuurd, jesammelt und jedruch hatten, säht de Tant joh, un me dorften zohluure beim Schlaachte. Dem Ohm Jüpp woor dat jar net esu räch, hä knoorz eröm un satz e bessich Jeseech op. Ävve dat woore me jewännt. Un wenn us de Tant, wenn de Ohm et net sooch, at ens henge de Uhre däht kraue ode övve de Bürschtehoor däht strööfe, mahte me uns nix druus. En Mellechkann voll Wurschbröh un zwei kleen Wurschkränz, een met Bloot- und een met Lävvewursch, wooren uns seche.

Et woor kohm Leech, wie me noh de Duuvejass schröömten, ahl Pluute ahn, ene wärme Schal öm de Hals. Me wöören jern vell flöcke jejange, ävve de Oma konnt net mieh esu siehr, un ohne die wuurd net jeschlaach un at jar keen Wursch jemaht.

*geblötsch* — eingebeult, eingedrückt

*Meertes* — Martin, 11. November

*Rööches* — Rauch, Räucherraum

*kohm Leech* — kaum hell *schrööme* — eilig gehen  
*Pluute* — Plunder, Kleidung

Jottseidank, de Pette woor noch net doh. Ävve am Huus stipp at en Leede, an die bahl die Sau ze hange köhm für se uszenämme un se avvhänge ze looße. Em Schopp dämp at et Wasse für en de Bröhtrooch, en däm die Sau jeschaav wuurd, bes kenn Bürschte mieh op de Schwaad wöören.

De Ohm un senge Broode dähten jrad de Brechstang en de Erd ramme. Doh kohm dat Ferke jlich drahn, un net lebendich wedde dovan.

En Schodde leev uns övve et Liev un de Röggen erav.

„Tant Jriet, dörfe me noch ens en de Stall luure jonn?“ Se jink met, trook de Frengel von de Poorz. Doh looch die Sau em Strüh, flapp es met enem Uhr, maht es „röff, röff“ un woor ze satt un ze fett für de Kopp ze hävve. Se däht uss leed, un och wedde net.

Lang heel mer et net us en däm Verschlaach. De Ferkespiss stooch eenem esu schärep en de Naas, dat me an et schlenge kohm.

Doh reef och at eene övve de Hoff: „De Pette kütt!“

Hä kohm jraad von de Jass erenn. Me hätten en von Jott weeß wie wegg jekannt. Hä däht jet höppe met eenem Been, su ene Buch met enem Schötzel dröm joov et blos eenmol em Dörep, un wer söss vonn alle Mannskerl däht ene Henkelkorev met enem wieße Dooch drövve vürrem Buch draage?

Onge däm Dooch loochen en etliche Mätze, et jefährlichs et Stächmätz, wat der Sau bes en et Hätz jink, en Knochesääch un en zwei, drei Bürschteschelle. De Schliefstohl luurt mem Häff an de Segg erus.

De Pette bejröös de Oma, de Tant, de Ohm, schlooch seng Schötzel op Segge un trook e Sackdooch us de Täsch, esu jruus wie e Koppkesse, wösch sich domet övve de Pläät un krääch wie all Kerls ene Koorn.

Dann krepelte de Maue erop bes ahn de Ellebooge. Jung, dene Ärme sooch me ahn, datte en Sau kleen konnt krieje. Hä luurt noch ens en de Korev, probiert de Leede, waggelt am Brechiese.

„Donn noch e paar Schlääch drop, Jüpp, dat ess me net fass jenoch! — Wo es de Emme mem Rührbessem un de Pann?“ — für et Bloot ze rühre — „Loß mich ens de Ax sehn!“

Hä beluurt sich de Stell, däht se wooge un stipp sich dropp. „Suh, herr met däm Veeh!“ sähte.

De Ohm nohm e Seel, jood dommedeck, e Haseleknävvelche un schluff dorech de Poorz en de Ferkesstall. De Tant blevv an de ahnjelähnte Poorz stonn, me huurt die Sau e paarmol „röff-röff“ maache, se quietsch ens, un dann maht de Tant de Poorz henge wedde op. Me huurt, wie de Ohm dä Sau met dem Knävvelche op de Schinke klopp, ävve et duurt noch en ganze Zegg, bes se endlich eruskohm. Se blenzelt en et Leech, schnüvvelt eröm, däht e paar tapsije Schrett un moht emme ens wedde vom Ohm op de een ode andere Segg jeklatsch werde, bes se am Ieserängel stonnt, öm et rächte Hengebeen et Seel, dat de Ohm jetz kuurt övve de Erd ahn dä Rängel däht benge.

Wie die Sau nu wegge wohl tappe, trook et ihr et Been hengen fott, un sie wuurd jeck un quietsch wedde.

Nu stalt sich de Pette met de Ax henge de Vöddebeen nävven se. Et duurt ävve wahl en haleve Menutt, bes se rühijer wuurd, un de Pette moht noch e paarmol nohrötsche.

Johzeggs hoov he de Ax, mem stompe Äng noh vürren, huh övve de Kopp, mir all drömeröm heelen de Luff ahn, de Tant hoov de Häng für de Muhl — noch ene Häzzschlaach, — noch eene —, doh fetz de Ax erav, der Sau op de Stiern. Et joov ene Flatsch, äs wenn e Kottlett mem Flatschbeil jeklopp wüurd.

*Schwaad* — Schwarte

*Schodde* — ein Schauer

*Frengel* — Holzpflock

*schlenge* — schlucken

*Schötzel* — Schürze

*Bessem* — Besen

*Haseleknävvelche* — Haselnußstöckchen

Un dann dächt die Sau ene haade Krieh, dat et eenem wieh en de Uhre dächt, se maht ene Schnöggs noh de Segg, reß met ihre drei Zentnere et Iese janz scheev bes bahl op de Erd, un weil de Schleng net faß jenoeh jetrocke woor, flutsch et Seel drövve fott, un die Sau stolepet un schnöcks op de Jass ahn am Hoff erus un kreetsch dobei, dat de Hohnde övve de Zong jinken.

Am Jossesteen feel se op de Erd un blevv e paar Oogenbleck lieje. Doh hatten de Pette, de Ohm un senge Broode sich von ihrem Schreck bekräch, sprongen noh un krächten et Seel ze packe, iehr dat die Sau sich wedde huh rappelt.

En etliche Fenstere en de Nohperschaff jinken op. Eener reef: „Dem Pette es de Sau tirre jejange!“

Bes die drei Mannskerl se wedde en de Hoff jeschleev, de Pool eneus fassjekielt hatten, stonnten seche en zwanzich Löck drömeröm. Un keene maht e erns Jeseech, bes op de Ohm Jüpp.

Wie de Pette de Ax wedde hoov, knick dat Veeh en de Hengebeen en. Un wie et de Kopp e besje hoov, kräch et de zwette Schlaach, diesmohl richtich mezzen zweschen de Ooge, un kipp öm.

Em Nu kneeten de Pette mem Stächmätz un met de Holzschruuv un de Jrooß met Emme un Pann nävven dem Dier. Eene deefe Stech, un wie de Pette et Mätz wedde erustrook, schoß et Bloot en de Pann. Wie die voll woor, dächt de Pette de Holzschruuf en de Stech, de Jrooß kipp et ruude Bloot en de Emme un de Tant joov sich mem Bässem an et schlaage.

Een-, zweimohl dächt die Sau noch schnüüve, dann leht se et Rengelstätzje hange un verreck.

Dann wurd se jebröht un jeschaav, op de Leede jelaat un opjeschnege wie bei jeedem Schlaachte. De anderen Daach wurd jewuursch un jesalze, bes alles versorech woor, wat me von dem Veeh bruche konnt.

Nur die Stell, wo der Ieserängel jestochen hatt, konnt me noch lang sehn, un e paar Daach loochen de Ferkesbürschte om Messhoofe. Bes en de Somme heelen Würsch, Fleesch un Schinke, et Schmalz bes övve de Hervskermes.

Un jedesmohl heesch et: dat es von dä jeblötschte Sau!

Nur de Pette wohl nix mieh dovon hüüre.

*tirre* — weglaufen

## De Käsper fiehrt Kohn enn

Hä woor zemlich en Lehre alt un jries wurde, de Wahns Käsper, hä hatt et off em Lävve schwer jehatt un hä woor at lang alleen. Dröm sett net ze hatt met em un doht em senge „eenzije Truus“, wie e luute säht, verjönne, och, wenne at ens eene kötte deht ode jett laut wierd, wennere eene ode zwei zuvell hätt.

Ävve et lätzte Johr es em suhr wurde! Wat hatte de Jeech en de Knoche! Un wat dächten em de Häng zeddere! Et woor bahl net ahnzesehn, watte für en Nuut un ene Bersch hat, besse seng drei, vier, fönnef Körnche em Liev hatt. Un emme öfte kippem ere eent öm, ode hä dächt de Hälfte schlabbere.

Jozecks brohte esujar Höllep, hä braht et Vühjelche net mieh bes ahn de Muhl. Dat woor en Peng! Hä sooch emme dröckelije uus un säht selleve: „Enä, ech senn es bahl leed, dat ös kee Lävve mieh!“

Wiere ävve op Märtesdaach erennkohm un stalt sich an de Thek un laach övveret janze Jeseech su unduhenich wie fröhter, do schöddelt de Thiesens Pette de Kopp, wie de Käsper säht: „Drei Kohn, un bes ovven voll!“

*Käspe* — Kaspar

*eenzije Truus* — einziger Trost  
*luute* — immer kötte — betteln

*Jeech* — Gicht

*Beersch* — Anstrengung

*dröckelich* — gedrückt, verzagt

*undubenich* — nichtsnutzig

Dene andere wuurten de Ooge emme jrüüte, wiere en Koord us de Täsck krohs un sich die öm de Nacke laht. Die Kohrd hatt an eenem Äng en Schleg. Die dächt sich de Käsper öm de rächte Mau, nohm en die Hand et Köhrnche, trohk met de linke Hand an de Kohrd, bes et Vüjelche für de Muhl woor, spetz de Leppe, schnöcks de Kopp noh hengen, un fott woor de Köhrn. En zwei Menutten hatte se alle drei em Liev.

Dat Kunststöck mohte dem Pette, dann dem Lindlohrsch Köbes, dann dem Bläsesch Schäng füürmaache. Hä wuurd bestaunt wie de ierschte Zeppelin, emme mieh wohlen dat Kunststöck sehn un joovenere eene uus.

Se brahten en och heem un lahten en met Schoohn un Kammesohl op et Bett.

Noch bes bahl de andere Pengsde hätte met der Kohrd senge Köhrn enjefahre.

Des Morjens fong en et Nohpersch Nettche kält un stief em Bett. Usse Herrjott trüüs en en de Iewichkeet!

*Kammesohl* — Rock

*Pensde* — Pflingsten

### Botz wedde Botz

Hatt Ühr de Jeeße-Jüppche jekannt? Net? Doh hatt er jett verpass! Ussewendich wore e jankich Männche, att ens jett hofferdich ahnjedonn met Schohn un Kamasche un de blänkije Uhrkätt führem Buch. Männchemols hatte et Sonndaachswöbche un se Hötche met enem Stöck Ferkesbürschte drop en de Woch ahn. Un hä jink de mierschte Zeck övve de Strooß wie enen Hahn, dä stolz woor un sich en de Bross worref, wenne e Hohn jetredde hatt.

De kleen, bletzije Ööjelche övve zwei Bäckelche, die uussooche wie usjestopp, leehte jauh rondjonn, et jink em nix dedorech. Övveall mohte klooch kalle, un dobei merkten net blos die Ahle, dat et mierschte Windeie wore, och de Pänz mahten sich e Spell druus, en seng Spröck klopp ze looße.

Eejentlich hatte für de Scholl net vell metkrääje von deheem, un wenn de Herr Lehrer männeschmohl für en säht, hä söhl sich et Lierjeld weddejävve looße, dann däterem Unrääch, hä hatt jarkeent krääch.

Och söss hatten em de Ahle net vell vererv wie e kleen Hötche em Övvedörrep, een, zwei Öörtche Plaaz für Kooern un Erpel un jett hatt Jraas un Strau en de Fusshecke.

Et Nies, watte jehieroot hatt, konnt verhafftich bes vier zälle. Dat wor dem Jüppche rääch, et dächt em net dohengerluure, wannerem jet wiesmaache wohl. Un dat dächte övv, wannerem säht, hä jink op „de Handel“. Et frooch nömme, watte handele dächt, un wor zefredde, wenn et Kaffe un Erpel joov un att ens jett Zupp un fuule Kies. Blos met Kaffebonne däteret vewänne. Wenn et seng Tass Kaffe hatt, joov et et Hämp vom Hengesch.

Ühr seht, janze esu domm wor de Jüppche och wedde net, wenn et em dröm jink. Wodröm et em jink? Met vell Jedöhns un wennich Arbeet de Zeck erömkrieje. Un hä nannt sich Handelsmann un Viehzüchter un Kleinviehschlächter.

En Wirklichkeit heele nix von Hamme un Zang, von Schöpp un Kaasch, un dowäjen hatte sich en Heerd Jeeße ahnjeschaff un etliche Schoof, Su konnte alle Oogenblecks erömströöfe, nohm „Veeh luure“, un hatt de Sechel jespaart.

Senge janze Stolz wor senge Jeeßebock, un alles, wat rääch es, dänn heele joot em Schoss. Hä hatt esujar en Prämie un e stief Äng Papier

*Jeeß* — Ziege

*jankich* — beweglich *hofferdich* — hoffärtig

*jauh* — schnell, beweglich

*Nies* — Agnes

*Kaasch* — Karst, Hacke

*de Sechel spaare* — sich drücken

*stief Äng Papier . . .* — Pergament —  
Urkunde mit Siegel

met enem jruße Vuhel drop un ene jedrähte Koord dran dofüür krääje, un dat hätte et leevs alle Daach öm de Hals jedraage.

Wemme bei em en de Hoff kohm un frooch: „Donnewädde, wat stink dat he esu?“, dann dähte saage: „Dat es menge Bock, dä sprönk mem Orden vom Kaiser Wellem. Dofüür darfe stinke.“

Ohnnüdüch Jeld usjävve däht de Jüppche net — de mierschte Zeck hatteres och jarkeent —, un wenne es „für de Handel“ en de Wirtschaft jink, dann nur, wenne seche wor, dattere eene spendiert krääch.

Wenn ävve es lang Zeck ke Wädde wor jewers für de Jeeß ze leede, un de Pännege woren jar ze knapp un net eene Fuss mieh em Huus, dann kratze sich doch henge de Uhre, un prackesiert, wie e jett lüüse könnt.

Me moß klooch senn! Paßt es op: wenn ich füre Ponk Schooffleesch sebbe Jrosche krieje un füre Ponk Jeeßfleisch blos fönnef, wat donn ich dann et leevs vekoofe? ——— Pschsch! Fengere op de Muhl! Hörsch! ———

Nu hatten em düss Johr drei Jeeße fönnef Limmche jehäck, dovon vier Böckelche. Et Foode hatt jereck, die jong Böck hatten joot ahnesatz. Drei Schoof woole och schlaachte.

E paar Nääch looche wackerich, dann wore sich eenich. Hä verzallt em Dörrep eröm, datte Schoof däht schlaachte, un seng Jeeßböck hätte nohm Wahn vekoof.

Kuurt noh Kloosdaach hengen, dat konnt jedereene senn, drei Dier avjetrocke ongerem Daach ahn de Leede für avzehange. Un dann rannte mem bloodije Schötzel doröm un hatt Stoohl un Mätz em Buchreehme hange un schneck Stöcke zerääch, „jood jewooch“.

Hä hatt flöck jett Dalere em Zijahreksesse. De zwätten Daach kohmen noch mieh Löck. Och et Stina. Nur, datt däm senge Schöch net vell öm Schooffleesch joov. „Ävve nu luurens, Mann, senn dat net zwei staatse Broode? Eene für Sonndaach, dä andere donn ich en et Salz für Neujohr. Allebeeds et Stöck jood zwei Ponk un zesamme füür nur drei Marek!“ „Joh, joh“, knoorz de Schöch un trook de Naas huh, „donn wennichstens jenooch Öllich drahn, du weefß, ich kann der Jeroch net legge“. Domet woole dat Fleisch opsegge däue. Ävve hä schnöcks zesamme. „Heh, luurens, Stina, dat süht ävve jelonge uus! Es dat Schooffleesch? Un heeh, dat es doch ke Fett vom Schoof? Dat kannste me net wiesmaache!“

Et Stina krääch esujar et Luuriese us de Kommod un laacht de Stiern en Fahle. Dann laach et un säht: „Du bes e Döppe, heeh, luur, he klävv joh noch de Schoofswoll drahn!“

Merkt er jett? Der Hermann, dem Schöch un dem Stina senge Quass merk et och, weil e net op de Schoofswoll erennfeel, un säht: „Dat es Jeeßfleisch!“ Un dann wurd jeschannt! Wenn dat all wohr wör wuorde, wat et irsch die drei un dann noch e paar Nohpere dem Jüppche ahn de Hals dähten wönsche, hä wör dreimohl ahm Kröcks jestorve.

Un dann op eemol waggelt de Hermann met de Uhre, trook de Muhl esu breet wie en Kraat un jrenk sich ere eene. Wie et Stina en en de Rebbe knuuf un säht: „Wat es met dir?“, platze eruus füür Laache un säht: „Waaht, dat hätte keenem Doove jedonn!“ Wat de Mamm och bäddelen däht, hä verreet nix. Nohm Oovendesse wore ävve en janze Zeck fott.

De andere Mettach — et Samstaach wor joh fröhter Fieroovend — troofen sich der Hermann un aach andere Quäss, die e bestallt hatt. Se jinken ze zwätt un ze drett kuhrt noheneen beim Jüppche erenn. Jedereene bestallt sich een ode zwei esujar drei Stöcke Fleisch, selbsredend vom Schoof, un dobei dähten se frooge un nörjele, sich

*Fuss* — Fuchs = Kupfermünze  
*prackesiere* — besorgt überlegen  
*lüüse* — einlösen, kaufen, verkaufen

*hörsch* — leise

*Kloos* — Nikolaus, 6. Dezember

*Schöch* — Georg

*Öllich* — Zwiebel

*schnöckse* — zucken

*Luuriese* — Brille  
*Döppe* — Tropf, Dummkopf

*Quass* — Junge, Sohn

*Kraat* — Kröte  
*jrenge* — grinsen

jäjeneggich ahnrämpele, vom Hondedste en et Dausendste dorje-  
neenquassele, de Fleeschporzione von eenem Äng an et andere  
erömdäue. Et Nies wurd jeroofe für ze Helepe, un dat joov noch  
mieh Zortier, et wore Spektakel wie en ene Jüddescholl.

Wat meent er, wat loss wor, wie se nu bezahle sollten! Jeder säht, er  
wör et irsch drahn, jede zwätte Broode moht noch ens jewooch  
werde, un dann bei dem Brassel die Rechnerei!

Dem Jüppche stonnt de Schweeß op de Stiern, hä krääch de  
Dadderich en de Häng, jozecks wosse övvehaup net mieh, wo hen-  
gen un füür wor.

Der eene schreit: „Zweiunehalle mol sebbe Jrosche es en Mark  
fönnefundressich!“ Ne andere beklaach sich, datte füür zwei mol  
drei Ponk drei Mark achzich sohl bezahle un wohl nur zwei Mark  
achzich jävve, ne vierte weckelt e Packett en, von däm de Jüppche  
meent, et wör övvehaup noch net bezahlt.

Et Nies schannt: „Heeh! Der Drecksack hätt de ne Dale jejovve un  
en mem Werseljeld wedde en de Täsche jedonn!“ Der däht wedder-  
schänge wie en Führn, schmess de Broode op de Desch un hatt em  
Handömdrieche ene andere en de Täsche un wohl seng Jeld wedde  
hann. Un dann schuuvten se sich, un de Desch kipp bei nöhks öm, et  
wore Spell wie op ene buure Kermes. Me huurt et övveret halleve  
Dörrep, un drenne vestonnt mé se eeye Woort net mieh.

Un dann woren se fott, un de Jüppche baschmoof, de Zijahr  
schmäck em net mieh, net ens senge staatse Jeeßebock luurte mieh  
ahn.

Et es nömme eruuskomme, wievell Verdeens em lans de Naas es  
jejange an däm Nommetaach. „En zehn, fuffzehn Daaler“, meent de  
Jerred vom Ovveloor, eene von dä nöng.

Me bröht sich net ze wondere, wemme jewahr wör wurde, dobbelt  
un dreimol esu vell wören an däm Samstaach un Sonndaach  
verschluup wuorde für luuter Jelaachs un Verzälle rond öm et  
Dörrep.

Noch noh Johr un Daach heesch et: pass op, wenn de me Jeeße-  
fleesch met Schoofswoll vekoofe wells, jeht et Botz wedde Botz!

*Führn* — Furie

*schuuvve* — schieben

*baschmoof* — völlig erschöpft

*Botz wedde Botz* — wie du mir, so ich dir